

МЕСЯЦА АПРЕЛЯ В 25-Й ДЕНЬ
СВЯТАГО АПОСТОЛА И ЕВАНГЕЛИСТА МАРКА
НА ВЕЧЕРНИ

Поем Блажен муж: 1-й антифон. На Господи, возвах: стихиры на 8, праздника 3 и апостола 5, глас 1.

Подобен: Небесных чинов:

Богогласных словес писателя, вернии, * и Египта великаго наставника, * достойно воспоем, вопиюще: * Марко мудре, учении и молитвами твоими * к невлаемому житию наставляти всех нас * не престай, Христов учениче.

Спутешественник был еси сосуда избраннаго * и с ним прошел еси всю Македонию; * в Риме же ученик быв Петру, * сладок сказатель показался еси * и почил еси, пострадав боголепно, во Египте, * Марко, друже Христов.

Изсохшия и ояденевшия души оживил еси * светлыми кроплениями Евангелия. * Темже твою, Божественный Марко, * светло с нами Александрия днесь * торжествует память и восхваляет, * покланяющихся твоим мощем.

Слава, глас 6:

Излияся благодать во устнах твоих, * Марко апостоле, * и был еси пастырь Христовы Церкви, * уча словесныя овцы * веровати в Троицу Единосущную, * во Едином Божестве.

И ныне, праздника.

Вход. Прокимен дне. Чтения три.

Соборнаго Послания Иаковля чтение (глава 1, стихи 1 – 12):

Иаков, Богу и Господу Иисусу Христу раб, обеманадесяте коленома, иже в разсеянии, радоватися. Всяку радость имейте, братие моя, егда во искушения впадаете различна, ведяще, яко искушение вашея веры соделовает терпение, терпение же дело совершенно да имать, яко да будете совершени и всецели, ни в чем же лишени. Аще же кто от вас лишен есть премудрости, да просит от дающаго Бога всем нелицеприемне и не поношающаго, и дастся ему. Да просит же верою, ничтоже сумняся: сумняй бо ся уподобися волнению морскому, ветры возметаему и развеваему. Да не мнит бо человек он, яко приимет что от Бога. Муж двоедушен, неустроен во всех путех своих. Да хвалится же брат смиренный в высоте своей, богатый же во смирении своем, зане, яко цвет травный, мимо идет. Возсия бо солнце со зноем и изсуши траву, и цвет ея отпаде, и благолепие лица ея погибе: сице богатый в хождении своем увядает. Блажен муж, иже претерпит искушение, зане, искусен быв, приимет венец жизни, егоже обеща Бог любящим Его.

Соборнаго Послания Иаковля чтение (глава 1, стихи 13 – 27):

Никтоже искушаемь да глаголет, яко от Бога искушаемь есть: Бог бо несть искуситель злым, не искушает же Той никогоже, Каждо же искушается, от своя похоти влекомь и прельщаемь. Таже похоть, заченши, раждает грех, грех же содеян раждает смерть. Не льститесь, братия моя возлюбленная: всяко даяние благо, и всяк дар совершен свыше есть, сходяй от Отца светов, у Негоже несть пременения, или преложения стень. Восхотев бо, породил нас словом истины, во еже быти нам начаток некий созданием Его. Темже, братия моя возлюбленная, да будет всяк

человек скор услышати и косен глаголати, косен во гнев. Гнев бо мужа правды Божия не соделоваает. Сего ради отложше всяку скверну и избыток злобы, в кротости примите всажденное слово, могущее спасти души ваша. Бывайте же творцы слова, а не точию слышатели, прельщающе себе самех, Зане аще кто есть слышатель слова, а не творец, таковой уподобися мужу, смотрящу лице бытия своего в зеркале. Усмотри бо себе и отыде, и абие забы, каков бе. Приникий же в закон совершен свободы и, пребыв, сей не слышатель забытлив быв, но творец дела, сей блажен в делании своем будет. Аще кто мнится верен быти в вас и не обуздавает языка своего, но льстит сердце свое, сего суетна есть вера. Вера бо чиста и нескверна пред Богом и Отцем сия есть, еже посещати сирых и вдовиц в скорбех их и нескверна себе блюсти от мира.

Соборнаго Послания Иаковля чтение (глава 2, стихи 1 – 13):

Братие моя, не на лица зряще, имейте веру Господа нашего, Иисуса Христа славы. Аще бо внидет в сонмище ваше муж, злат перстень нося, в ризе светле, внидет же и нищ в худе одежде, и воззрите на носящаго ризу светлу и речете ему: ты сяди zde добре. И нищему речете: ты стани тамо или сяди zde, на подножии моем. И не рассмотрите в себе, и бысте судии помышлений злых. Слышите, братие моя возлюбленная, не Бог ли избра нищия мира сего богаты в вере и наследники Царствия, еже обеща любящим Его? Вы же укористе нищаго. Не богатии ли насилуют вам, и тии влекут вы на судища? Не тии ли хулят доброе имя, нареченное на вас? Аще убо закон совершаете царский, по Писанию: возлюбиши искренняго своего, якоже себе самага, добре творите. Аще ли на лица зрите, то грех содеваете, обличаеми от закона, якоже преступницы. Иже бо весь закон соблюдет, согрешит же во едином, бысть всем повинен. Рекий бо: не прелюбы сотвориши, рекл есть: и не убиеш, аще ли не прелюбы сотвориши, убиеш нее, был еси преступник закона. Тако глаголите и тако творите, яко законом свободным хотяще суд прияти. Суд бо без милости не сотворшему милости, и хвалится милость на суде.

На стиховне стихиры, глас 1.

Подобен: Всехвальнии мученицы:

О Марко Богомудре, * премудраго книжника трость * и скорописца был еси, * Христово воплощение богодохновенне напишуй * и ясно вещай жизни безконечныя глаголы, * в нейже молися написатися поющим тя * и чтущим славную память твою.

Стих: Во всю землю изыде вещание их * и в концы вселенныя глаголы их.

О Марко всехвальне, * Христа благовествуяй, * вселенную протекл еси, * якоже солнце, * погубляяй всю зарями веры * многобожия тьму. * И ныне молися * даровати душам нашим * мир и велию милость.

Стих: Небеса поведают славу Божию, * творение же руку Его возвещает твердь.

О Марко апостоле, * в нихже прежде умножися злочестия безумие, * ты проповедал еси, * египетскую тьму * просвещением словес твоих отгоняя, * Богопроповедниче пребогате. * И ныне молися * даровати душам нашим * мир и велию милость.

Слава, глас 8:

Приидите, Небеснаго таинства проповедника * и служителя Евангелия, * псалмы и песньми Марка вси восхвалим: * сей бо река показася мысленнаго рая, * душевныя бразды Небесными тучами напаяя * и плодоносны показуя Христу Богу, * подающему всем молитвами его * очищение, и просвещение, и велию милость.

И ныне, праздника.

Тропарь, глас 3:

Апостоле святыи и Евангелисте Марко, * моли Милостиваго Бога, * да прегрешений оставление * подаст душам нашим.

Ин тропарь, глас тойже:

У верховнаго Петра научився, * апостол Христов был еси * и, яко солнце, странам возсиял еси, * Александриом удобрение быв, блаженне: * тобою Египет от прелести свободися, * евангельским твоим учением просвещ вся, * яко свет, столп церковный. * Сего ради твою память чтуще, светло празднуем, * Марко Богогласе, * моли тобою благовестимаго Бога * да согрешений оставление подаст душам нашим.

Слава, и ныне, праздника.

НА УТРЕНИ

На Бог Господь, тропарь праздника, дважды.

Слава, апостола глас 3:

Апостоле святей и Евангелисте Марко, * моли Милостиваго Бога, * да прегрешений оставление * подаст душам нашим.

И ныне, праздника.

По 1-й стихологии седален, глас 1.

Подобен: Гроб Твой:

Яко утро, благолепно возсиял еси миру, * тьму глубокую прелести верою отгнал еси, апостоле, * и души просветил еси; * темже вся светозарне Церковь поет днесь светоносную твою память, * Христа величаючи.

Слава, и ныне, праздника.

По 2-й стихологии седален, глас 4.

Подобен: Вознесыйся:

Научився от Источника жизни премудрости, * умудрил еси прежде неразумием служащия умовредне истуканным, премудре. * Темже ублажаешися во век века, * престолу предстоя Святыя Троицы * и прилежно моляся * обрести прегрешений разрешение, Марко апостоле.

Слава, и ныне, праздника.

По полиелеи седален, глас 8.

Подобен: Премудрости:

Идольскую гордыню низложив, Спасовы страсти желая, Марко апостоле, * явился еси миру, с Небесе всем источая чудеса, * и языком был еси, преблаженне, учитель. * Темже твою память по достоинству почитаем, * в песнях славяще и верно величающе: * Богогласе пребогате, моли Христа Бога грехов оставление подати * чтущим любовию святую память твою.

Слава, и ныне, праздника.

Степенна, 1-й антифон 4-го гласа.

Прокимен, глас 4: Во всю землю изыде вещание их * и в концы вселенныя глаголы их.

Стих: Небеса поведают славу Божию, творение же руку Его возвещает твердь.

Всякое дыхание:

Евангелие от Луки, зачало 50.

Во время оно, яви Господь и инех семьдесят ученик Своих, и посла их по двема пред лицем Своим во всяк град и место, а може хотяше Сам ити. Глаголаше же к ним: жатва убо многа, делателей же мало, молитесь убо Господину жатве, да изведет делатели на жатву Свою. Идите, се Аз посылаю вы яко агнцы посреде волков. Не носите влагалища, ни пиры, ни сапог, и ни когоже на пути целуйте. В оньже аще дом внидете, первее глаголите: мир дому сему. И аще убо будет ту сын мира, почиет на нем мир ваш, аще ли же ни, к вам возвратится. В том же дому пребывайте, ядуще и пиюще, яже суть у них, достоин бо есть делатель мзды своя. Не переходите из

дому в дом. И в онъже аще град входите, и приемлют вы, ядите предлагаемая вам, и изцелите недужныя, иже суть в нем, и глаголите им: приближися на вы Царствие Божие. И в онъже аще град входите, и не приемлют вас, изшедше на распутия его, рцыте: и прах, прилепший нам от града вашего, оттрясаем вам. Обаче сие ведите, яко приближися на вы Царствие Божие. Глаголю вам, яко Содомляном в день той отраднее будет, неже граду тому. Горе тебе, Хоразине, горе тебе, Вифсаидо, яко аще в Тире и Сидоне быша силы были бывшыя в ваю, древле убо во вретиси и пепеле сядяще покаялися быша, обаче Тиру и Сидону отраднее будет на суде, неже вама. И ты, Капернауме, иже до небес вознесыйся, до ада низведешися.

По 50-м псалме стихира, глас 6:

Излияся благодать во устнах твоих, * Марко апостоле, * и был еси пастырь Христовы Церкви, * уча словесныя овцы * веровати в Троицу Единосущную, * во Едином Божестве.

Канон праздника со ирмосом на 6 и святаго на 8, глас 1.

Песнь 1

Ирмос: Твоя победительная десница * боголепно в крепости прославися: * та бо, Безсмертне, * яко всемогущая, противныя сотре, * израильтяном путь глубины новосоделавшая.

Марка Боговидца восхваляя, призываю благодать Духа: яко да вдохнув ми светло, отженет неведение и Божественное богатство премудрости дарует.

Твоего Богогласнаго светом просветив, Спасе, благодатным, в мир послал еси, Слове Божий, благих яко виновный, Твое пришествие нам благовествующа.

Петру премудрому ученик быв и того обогатився сыновством, Марко всеславне, таинник показался еси таин Божиих и снаследник славы его был еси.

Богородичен: Иже египтяны во глубине потопив облаком Духа, Сей прииде от Тебе, Чистыя, египтяном послежде и Марком тех от прелести измени.

Катавасия: Воскресения день:

Песнь 3

Ирмос: Едине, ведый человеческого существа немощь * и милостивно в не вообрази, * препояши мя с высоты силою, * еже вопити Тебе, Святыи, * одушевленный храм * неизреченныя славы Твоя, Человеколюбче.

Тя, Ипостасную, Христе, Премудрость проповеда, лучами Твоими озаряемь, всему миру явльшуюся, Владыко, и жизнь дающую, и человеки просвещающую, угодник Твой славный Марк, Человеколюбче.

Струю прием, Христе, премудрости приснотекущую, яко река, шумящи, земныя напои Богоразумия светом концы, являя Твое суще истинно проречение, самовидец Твой Марк, Человеколюбче.

Петру последуя, мудре, яве, Евангелие яко ученик его вообразил еси, Богословия свет прием от него, апостоле, и Божие плотское пришествие возвестив ясно.

Богородичен: Египта перее, девическими руками носимый, демонская требища Ты потрясл еси и сему паки Марка послал еси вразумити всем Твое вочеловечение и Божественную, Христе, Твою тайну.

Кондак и икос праздника.

Седален, апостола, глас 1.

Подобен: Гроб Твой:

На высоту возшед добродетелей Божественный Марк, * возгремел еси нам спасительных догмат великия тайны, * Божественный проповедник быв. * Темже верою тя молим, преблаженне, * всякия скорби, согрешений и бед нас свободи.

Слава, и ныне, праздника.

Песнь 4

Ирмос: Гору Тя, благодатию Божиею приосененную, * прозорливыма Аввакум усмотрив очима, * из Тебе изыти Израилеву провозглашаше Святому * во спасение наше и обновление.

Во всю землю вещание твое изыде, и в концы, премудре, вселенныя твоих ясно глагол сила, давидски светло проповедающе спасение наше и обновление.

Явися, Спасе, яко молния, апостол вселенней премудрый, истины радость благовествуя, Богосиянием светолития просвещаемь во спасение наше и обновление.

Нозе твои пророчески украсишася, ибо паче слова нам благовестил еси проявленно мир, Богоприятне, плотию Явльшагося концем во спасение наше и обновление.

Богородичен: На облаце Слово девичестем седе, египетския советы и богоборныя мысли, обуив, разори, учении Божественнаго Марка, яко Милосерд, во спасение наше и обновление.

Песнь 5

Ирмос: Просветивый сиянием пришествия Твоего, Христе, * и осветивый Крестом Твоим мира концы, * сердца просвети светом Твоего Богоразумия * православно поющих Тя.

Искапал еси сладость благочестия словес твоих Божественных тучу, всюду лучами осияваемь, явлься благодатию яве мысленнаго Солнца, Марко всеблаженне Богоприятне.

Из дому Господня источник изшел еси и напояеши оляденевшая сердца струями богато духовными, плод вместо неплодствия приносить уча, апостоле.

Ты Петра великаго сын был еси и, сего ученьми просвещаемь всегда, души просветил еси к тебе тепле приступльших, блаженне, Боговидче апостоле.

Богородичен: Яко Человек от Девы рождся, египтяном, Христе, послался еси, от Отца возсияв прежде всяя твари, имже Марка помазал еси, Мудре, тех научающе Богоразумия таинством.

Песнь 6

Ирмос: Обыде нас последняя бездна, * несть избавляяй, * вменихомся, яко овцы заколения. * Спаси люди Твоя, Боже наш, * Ты бо крепость немощствующих и исправление.

Низложил еси бровь беззаконных, Господи, и досаждение гордое смирил еси, Апостола Твоего показав победоносца силою Твоею, Ты бо крепость немощствующих и исправление.

Венец надежды, славне, имже ныне венчаемся, словесы твоими проповедал еси, мудре Марко, Зиждителя твари, Иже в нашу славу исплетен естеством плоти.

Петр ты верховный, славне, яве тайно научи Евангелие списати честное, показав служителя твоего Божественныя благодати, ты бо нам Богоразумия свет простерл еси.

Богородичен: Египта, иже первее во тьме суца, Господи, Девою Богоматерию просветил еси, яко Младенец прошед, того обличил еси суетство учения Богогласнаго Марка, Человеколюбче.

Кондак, глас 2.

Подобен: Вышних ища:

С высоты приим благодать Духа, * риторская плетения разрушил еси, апостоле, * и, языки вся уловив, Марко всеславне, * твоему Владыце привел еси, * Божественное проповедав Евангелие.

Икос: Верховнаго апостола ученик быв, с ним Христа, Сына Божия, проповедал еси, на камени истины утвердив лестию колеблющихся. На немже и мене утвердив, души моя исправи стопы, яко да вражиих сетей избавлься, непреткновенно славлю тя: ты бо всех просветил еси, Марко мудре, Божественное проповедав Евангелие.

Песнь 7

Ирмос: Тебе, умную, Богородице, пещь, * рассмотрим, вернии: * якоже бо отроки спасе три Превозносимый, * мир обнови, во чреве Твоем всецел, * хвальный отцев Бог и препрославлен.

Божественными блистании освещаемь, возломлением тайно возпосылаеши заревидныя лучи, Марко преблаженне: Слово бо проповедал еси воплощаемое, Безлетное, хвальнаго отцев Бога и препрославленнаго.

Богодельными, Вседетелю, силами Богогласнаго ученика вооружив, чудодейственника сего совершил еси: недуги бо отгна и язи исцелил еси, прехвальнаго Твоего проповедуя Бога и препрославленнаго.

Ученическаго лика старейшаго учителя имея, Божественнаго Петра, подобен сему явился, все бо исправил еси церковное исполнение прехвальнаго отцев Бога и препрославленнаго.

Богородичен: Столп сам во Египте поставил еси, Евангелия твоего писание Рождшемуся без семени от Богоматере, речением последуя Исаии, преславне, прехвальнаго возвеца Бога и препрославленнаго.

Песнь 8

Ирмос: В пещи отроцы Израилевы, * якоже в горниле, * добротою благочестия чистее злата блещахуся, глаголюще: * благословите, вся дела Господня, Господа, * пойте и превозносите во вся веки.

Рождшееся Слово от Отца прежде всех век, в естество человеческое облекшася Христа, проповедал еси, славне, и вопиял: вся дела Господня, Господа пойте и превозносите во вся веки.

Давшаго избавление себе за наше согрешение и страсть падших, воздвигшаго Христа прославил еси, славне, вопия: вся дела Господня, Господа пойте и превозносите во вся веки.

Петрову Марк повинуюся премудрому учительству, премудре писании вообразил еси верным честное Евангелие, вопоиющим: вся дела Господня, Господа пойте и превозносите во вся веки.

Богородичен: Дева, Еммануила носящи яко Младенца, предста египтяном, имже, яко светлая звезда, Марк посылается, взывая: вся дела Господня, Господа пойте и превозносите во вся веки.

Песнь 9

Ирмос: Образ чистаго рожества Твоего * огнепалимая купина показа неопальная. * И ныне, на нас напастей свирепеющую угасити, молимся, пещь, * да Тя, Богородице, * непрестанно величаем.

Достиг источника неизреченна, трисолнечнаго, Богоявленне, сияния, чистейша наслаждаешься и яснейша обожения, еже паче ума, со Ангелы ликуя непрестанно, преблаженне.

Петрова общник быв учения и Божественнаго проповедания, в Небесных живехи селениих, с нимже, Богоглаголиве преблаженне, и молишися о нас, Марко апостоле.

Свет, трисиянно совокупаемь, единственно же паки странно устроаемь, проповедал еси благочестно, досточудне, просвещаемь зарею благодати. Темже ты молим: о нас присно молися.

Богородичен: Марк, честный апостол, египтяном святитель даровася; к нимже, яко Младенец воплощя, прииде, от Девы Чистыя Богоматере, Господь славы, Егоже достойно величаем.

Светилен.

Подобен: Жены, услышите:

Премудрости Небесныя научився, апостоле, * плетения витийская и числа звездословцев разорил еси языком твоим, * о Марко преславне, и, ученик быв Петров, * миру проповедал еси Евангельская словеса.

Слава, и ныне, праздника.

На хвалитех стихиры, праздника 3. И апостола 3, глас 1.

Подобен: Всехвальнии мученицы:

Марко всеблаженне, * от сладостнаго потока пил еси, * яко из Едема устремившаяся * пресветло чистая река мира, * обливаяй водами * Евангельския твоя проповеди * земли лице, * церковныя тверди напаяя * Богодохновенными учении.

Марко преславне, * Моисей убо прежде * египтяны в мори потопи, * но ты, премудре, * от моря прелести тех извлекл еси * силою же к тем с плотию Пришедшаго * и тех рукотворенная низложивша * мышцею высокою.

О Марко всесвященне, * во свете Духа живый, * духовен весь был еси, * и ныне, всебогате, * иже ко Владыце неоскудными зрении * и блаженнейшими осиянии, * положеньми обожаемь * таинства главизну, * и кончину обрел еси многовожденну.

Слава, глас 6. Самогласен:

Премудрый ловче, святыи учениче, * делателю Спасов и сказателю Того
страстей, * иже тварь верою обтек, * и прельщенныи языки собрав, * и Богу привед,
* яко кадило доброе, на Небеса возведеса. * Темже, предстоя Судии, * моли
избавитися нам от беззаконий наших * и в День Судный избавитися мучения.

И ныне, праздника.

Славословие великое и отпуст.

НА ЛИТУРГИИ

Блаженны от канона праздника, песнь рядовая и святого песнь 3-я.

Тя, Ипостасную, Христе, Премудрость проповеда, лучами Твоими озаряемь, всему миру явльшуюся, Владыко, и жизнь дающую, и человеки просвещающую, угодник Твой славный Марк, Человеколюбче.

Струю прием, Христе, премудрости приснотекущую, яко река, шумящи, земныя напои Богоразумия светом концы, являя Твое сущие истинно проречение, самовидец Твой Марк, Человеколюбче.

Петру последуя, мудре, яве, Евангелие яко ученик его вообразил еси, Богословия свет прием от него, апостоле, и Божие плотское пришествие возвестив ясно.

Богородичен: Египта первее, девическими руками носимый, демонская требища Ты потрясл еси и сему паки Марка послал еси вразумити всем Твое вочеловечение и Божественную, Христе, Твою тайну.

Тропарь святого, глас 3:

Апостоле святыи и Евангелисте Марко, * моли Милостиваго Бога, * да прегрешений оставление * подаст душам нашим.

Ин тропарь святого, глас тойже:

У верховнаго Петра научився, * апостол Христов был еси * и, яко солнце, странам возсиял еси, * Александрию удобрив быв, блаженне: * тобою Египет от прелести свободися, * евангельским твоим учением просвещ вся, * яко свет, столп церковный. * Сего ради твою память чтуще, светло празднуем, * Марко Богогласе, * моли тобою благовестимаго Бога * да согрешений оставление подаст душам нашим.

Кондак святого, глас 2.

С высоты приим благодать Духа, * риторская плетения разрушил еси, апостоле, * и, языки вся уловив, Марко всеславне, * твоему Владыце привел еси, * Божественное проповедав Евангелие.

Прокимен, глас 8: Во всю землю изыде вещание их, * и в концы вселенныя глаголы их.

Стих: Небеса поведают славу Божию, творение же руку Его возвещает твердь.

Апостол, зачало 63.

Братие, смиритесь под крепкую руку Божию, да вы вознесет во время. Всю печаль вашу возвергше Нань, яко Той печется о вас. Трезвитесь, бодрствуйте, зане супостат ваш диавол, яко лев рыкая, ходит, иский кого поглотити, емуже противитесь тверди верою, ведуще, яко теже страсти случаются вашему братству, еже в мире. Бог же всякия благодати, призывый вас в вечную Свою славу о Христе Иисусе, мало пострадавшыя, Той да совершит вы, да утвердит, да укрепит, да оснует. Тому слава и держава во веки веков. Аминь. Силуаном вам верным братом, яко нещую, в мале написях, моля и засвидетельствуя сей быти истинней благодати Божией, в нейже стоите. Целует вы яже в Вавилоне соизбранная, и Марко сын мой. Целуйте друг друга лобзанием любви. Мир вам всем о Христе Иисусе. Аминь.

Аллилуиа, глас 1: Исповедят небеса чудеса Твоя Господи, ибо истину Твою в церкви святых.

Стих: Бог прославляемь в совете святых.

Евангелие от Марка, зачало 23.

Во время оно, призва Иисус обанадесяте, и начат их посылати два два, и даяше им власть над духи нечистыми. И заповеда им, да ничесоже возмут на путь, токмо жезл един, ни пиры, ни хлеба, ни при поясе меди, но обувени в сандалия, и не облачитися в две ризе. И глаголаше им: идеже аще внидете в дом, ту пребывайте, дондеже изыдете оттуду. И елицы аще не примут вы, ниже послушают вас, исходяще оттуду, оттрясите прах, иже под ногами вашими, во свидетельство им. Аминь глаголю вам, отраднее будет Содомом и Гоморром в день судный, неже граду тому. И изпешдше проповедаху, да покаются. И бесы многи изгоняху, и мазаху маслом многи недужныя, и изцелеваху.

Причasten: Во всю землю изыде вещание их, и в концы вселенныя глаголы их.

Святой апостол и евангелист Марк

Святой апостол и евангелист Марк, называемый также Иоанн-Марк (Деян. 12:12), апостол от 70-ти, племянник апостола Варнавы (память 11 июня), родился в Иерусалиме. Дом его матери Марии примыкал к Гефсиманскому саду. Как говорит церковное предание, в ночь Крестных страданий Христа он следовал за Ним, завернувшись в плащ, и убежал от схвативших его воинов (Мк. 14:51–52). После Вознесения Господня дом матери святого Марка стал местом молитвенных собраний христиан и пристанищем для некоторых из апостолов (Деян. 12:12). Святой Марк был ближайшим сподвижником апостолов Петра, Павла (общая память 29 июня) и Варнавы. Вместе с апостолами Павлом и Варнавой святой Марк был в Селевкии, оттуда отправился на остров Кипр и прошел его весь с востока на запад. В городе Пафе святой Марк был свидетелем того, как апостол Павел поразил слепотой волхва Елима (Деян. 13:6–12). После трудов с апостолом Павлом святой Марк вернулся в Иерусалим, а затем вместе с апостолом Петром побывал в Риме, откуда по его повелению отправился в Египет, где основал Церковь. Во время второго благовестнического путешествия апостола Павла святой Марк встретился с ним в Антиохии. Оттуда он отправился на проповедь с апостолом Варнавой на Кипр, а затем опять ушел в Египет, где вместе с апостолом Петром основал много Церквей, в том числе в Вавилоне. Из этого города апостол Петр направил послание малоазийским христианам, в котором с любовью отзывался о святом Марке, своем духовном сыне (1Пет. 5:13). Когда апостол Павел находился в узах в Риме, апостол Марк был в Ефесе, где кафедру занимал святитель Тимофей (память 4 января). Вместе с ним апостол Марк прибыл в Рим. Там он и написал святое Евангелие (ок. 62–63). Из Рима святой Марк снова удалился в Египет и в Александрии положил начало христианскому училищу, из которого впоследствии вышли такие знаменитые отцы и учителя Церкви, как Климент Александрийский, святитель Дионисий (память 5 октября), свт. Григорий Чудотворец (память 17 ноября) и другие. Ревнуя о устройении церковного Богослужения, святой апостол Марк составил чин Литургии для александрийских христиан. Затем святой Марк с проповедью Евангелия посетил

внутренние области Африки, был в Ливии, Нектополе. Во время этих путешествий святой Марк получил повеление от Духа Святого вновь идти в Александрию для проповеди и противодействия язычникам. Там он поселился в доме сапожника Анании, которому исцелил больную руку. Сапожник с радостью принял святого апостола, с верой внимал его повествованиям о Христе и принял Крещение. Вслед за Ананией крестились многие жители той части города, где он жил. Это возбудило ненависть язычников, и они собирались убить святого Марка. Узнав об этом, святой апостол поставил Ананию епископом, а трех христиан: Малка, Савина и Кердина – пресвитерами. Язычники напали на святого Марка, когда апостол совершал богослужение. Его избили, волокли по улицам города и бросили в темницу. Там святой Марк удостоился видения Господа Иисуса Христа, Который укрепил его перед страданиями. На следующий день разъяренная толпа снова повлекла святого апостола по улицам города на судилище, но по дороге святой Марк скончался со словами: «В руки Твои, Господи, предаю дух мой». Язычники хотели сжечь тело святого апостола, но, когда развели костер, все померкло, раздался гром и произошло землетрясение. Язычники в страхе разбежались, а христиане взяли тело святого апостола и погребли его в каменной гробнице. Это было 4 апреля 63 года. Память его Церковь празднует 25 апреля. В 310 году над мощами святого апостола Марка была построена церковь. В 820 году, когда в Египте установилась власть арабов-магометан и Христианскую Церковь теснили иноверные, мощи святого перенесли в Венецию и поставили в храме его имени. В древней иконографической традиции, усвоившей святым Евангелистам символы, заимствованные из видения святого Иоанна Богослова (Откр. 4:7), святой Евангелист Марк изображается со львом – в ознаменование могущества и царственного достоинства Христа (Откр. 5:5). Святой Марк писал свое Евангелие для христиан из язычников, поэтому он останавливается преимущественно на речах и делах Спасителя, в которых особенно проявляется Его Божественное всемогущество. Многие особенности его повествования можно объяснить близостью его к апостолу Петру. Все древние писатели свидетельствуют, что Евангелие от Марка является краткой записью проповеди и рассказов первоверховного апостола. Одной из центральных богословских тем в Евангелии святого Марка является тема силы Божией, совершающейся в немощи человеческой, ибо Господь делает возможным то, что у людей невозможно. При действии Христа (Мк. 16:20) и Духа Святого (Мк. 13:11) ученики его идут и проповедуют Евангелие всей твари (Мк. 13:10; 16:15).